

東
華
續
錄

東華續錄目錄

咸豐一

起道光三十年正月丁未盡二月

咸豐二

起道光三十年三月盡四月

咸豐三

起道光三十年五月盡六月

咸豐四

起道光三十年七月盡八月

咸豐五

起道光三十年九月盡十月

咸豐六

起道光三十年十一月盡十二月

咸豐七

起咸豐元年正月盡二月

咸豐八

起元年三月盡四月

咸豐九

起元年五月盡六月

咸豐十

起元年七月盡八月

咸豐十一

起元年九月盡十月

咸豐十二

起元年十一月盡十二月

咸豐十三

起二年正月盡二月

咸豐十四

起二年三月盡四月

咸豐十五

起二年五月盡六月

咸豐十六

起二年七月盡八月

咸豐十七

起二年九月盡十月

咸豐十八

起二年十一月盡十二月

咸豐十九

三年正月

咸豐二十

三年二月

咸豐二十一

三年三月

咸豐二十二

三年四月

咸豐二十三

三年五月

咸豐二十四

三年六月

咸豐二十五

三年七月

咸豐二十六

三年八月

咸豐二十七

三年九月

咸豐二十八

三年十月

咸豐二十九

三年十一月

咸豐三十

三年十二月

咸豐三十一年

四年正月

咸豐三十二年

四年二月

咸豐三十三年

四年三月

咸豐三十四年

四年四月

咸豐三十五年

四年五月

咸豐三十六年

四年六月

咸豐三十七

四年七月

咸豐三十八

四年閏七月

咸豐三十九

四年八月

咸豐四十

四年九月

咸豐四十一

四年十月

咸豐四十二

四年十一月

咸豐四十三

四年十二月

咸豐四十四

五年正月

咸豐四十五

五年二月

咸豐四十六

五年三月

咸豐四十七

五年四月

咸豐四十八

五年五月

咸豐四十九

五年六月

咸豐五十

五年七月

咸豐五十一

五年八月

咸豐五十二

五年九月

咸豐五十三

五年十月

咸豐五十四

五年十一月

咸豐五十五

五年十二月

咸豐五十六

六年正月

咸豐五十七

六年二月

咸豐五十八

六年三月

咸豐五十九

六年四月

咸豐六十

六年五月

咸豐六十一

六年六月

咸豐六十二

六年七月

咸豐六十三

六年八月

咸豐六十四

六年九月

咸豐六十五

六年十月

咸豐六十六

六年十一月

咸豐六十七

六年十二月

咸豐六十八

起七年正月盡二月

咸豐六十九

七年三月

咸豐七十

起七年四月盡五月

咸豐七十一

七年閏五月

咸豐七十二

七年六月

咸豐七十三

七年七月

咸豐七十四

七年八月

咸豐七十五

七年九月

咸豐七十六

七年十月

咸豐七十七

起七年十一月盡十二月

咸豐七十八

起八年正月盡三月

咸豐七十九

八年四月

咸豐八十

八年五月

咸豐八十一

起八年六月盡七月

咸豐八十二

八年八月

咸豐八十三

八年九月

咸豐八十四

起八年十月盡十二月

咸豐八十五

起九年正月盡三月

咸豐八十六

起九年四月盡五月

咸豐八十七

起九年六月盡七月

咸豐八十八

起九年八月盡九月

咸豐八十九

起九年十月盡十二月

咸豐九十

起十年正月盡三月

咸豐九十一

十年閏三月

咸豐九十二

十年四月

咸豐九十三

十年五月

咸豐九十四

十年六月

咸豐九十五

十年七月

咸豐九十六

起十年八月盡九月

咸豐九十七

起十年十月盡十二月

咸豐九十八

起十一年正月盡二月

咸豐九十九

起十一年三月盡四月

咸豐一百

起十一年五月盡七月癸卯

東華續錄

咸豐一

臣王先謙敬編

臣陶潛宣恭校

文宗顯皇帝 宣宗第四子也 母孝全成皇后鈕祜祿氏原任

乾清門二等侍衛世襲二等男追封承恩公頤齡之女淑慎安貞

仁慈恭儉事 宣宗成皇帝恪襄內治懋著坤儀以道光十一年

辛卯六月初九日丑時誕 上於御園之湛靜齋後更爲基福堂

是也 上生有聖德神志內充發音鏗洪舉步嶽重十四年甲午

三月 宣宗成皇帝恭謁 昌陵隨侍行禮 御製詩曰初攜幼

子祈 慈佑並識語云祥呈姬媿福衍孫枝 慈佑無疆欣感曷

其有極蓋 恩勤鞠育隱然以 祖武克繩默祈 貽翼 天章

流播已可知 聖心之所屬焉六齡就傅受書於洗馬杜受田

聰明天寶學問日新經史淹通 聖藻炳蔚 履信書屋詩文積

有卷帙雖 宸脩念典不尙詞章而 春苑行蒐則歌廣吉日

靈壇展祀則句詠同雲援筆成吟胥垂典則陳經偶暇練藝習勞

常製槍法二十八勢曰棣華協力刀法十八勢曰寶鏐宣威皆

宣宗賜名 上在潛邸時與恭親王奕訢所講肄者博 慈顏之

愉悅助同氣以匡襄惟 孝惟 友乃 武乃 文非甚 盛德

其孰能與於斯二十年庚子正月當 孝全成皇后大事悲深罔

極擗踊哀傷 宣宗俯鑒肫誠每值忌辰周年必 命躬親行禮

用展孝思 上孺慕銜悲屢形章什二十餘年如一日焉 十六

年丙午六月十六日 宣宗遵密建 家法 親書 上名緘置

祕函豫立儲貳越戊申祈穀大祀特 命恭代行禮由是 北郊

禮神則代陳琮幣 東陵敷土則代謁 橋山以至 太廟薦新

奉先展拜寅承主鬯 聖眷日加隆矣二十八年戊申二月辛

未 賜成大婚禮是爲 孝德顯皇后三月 宣宗恭謁 西陵

至龍泉峪 大殿召 上至 御座旁命讀 硃諭藏諸東楹蓋

聖意深遠默定 陵名亦以付託得人俾無忘 先志 上恪

遵 遺訓恭鐫諸 慕陵后牌坊南善繼善述益見 聖人大孝

十月癸卯 宣宗幸 上所進膳 上捧觴鞠脍怡色趨承問視

婉愉 歡心允愜二十九年己酉十二月乙亥 孝德顯皇后升

遐適值 孝和睿皇后大事時 宣宗聖壽臻古稀矣銜哀積慕

聖體違和馴致大漸 上親承 顧命寅紹丕基用是寔海歸

心天人協應貽萬億年無疆之庥焉○道光三十年庚戌春正月

甲午朔越丁未 宣宗成皇帝賓天時 宣宗居圓明園慎德堂

苦次卯刻召宗人府宗令載銓御前大臣載垣端華僧格林沁軍

機大臣穆彰阿賽尙阿何汝霖陳孚恩季芝昌內務府大臣文慶
宣示 硃諭立皇四子 爲皇太子午刻 宣宗疾大漸 上哭
詣慎德堂少頃 宣宗升遐 上稽顙哀慟呼號擗踊無算扈從
近臣等遵奉 硃筆遺旨請 上卽正尊位 上恭視小殮畢奉
大行皇帝靈駕進城戌刻奉安於乾清宮西次間亥刻 上敬
視大殮畢奉安 梓宮於乾清宮正中行殮奠禮 上呼號哭泣
竟日水漿不入口羣臣伏地環跪懇 上節哀 上悲慟不能自
已左右皆弗忍仰視 上以上書房爲倚廬席地寢苦每日詣
几筵前供奠三次○諭內閣朕受 皇考大行皇帝鞠育訓誨
深恩昊天罔極 聖壽年屆七旬精神強固方謂期頤可卜愛日
彌長上年入夏以來偶爾違和雖氣體稍遜於前猶復 躬親視
事內外奏牘披覽如常嗣因 皇祖妣大事哀慕毀瘠以致氣血

大虧本日卯刻力疾召見宗人府宗令御前大臣軍機大臣內務
府大臣親降 硃諭立朕爲皇太子 聖訓周詳諄諄以國計民
生爲念朕痛哭受命哀迫戰兢方冀朝夕有所稟承 慈躬稍節
勞勩永保康和詎意親奉 顧命後病勢增劇遂致大漸 龍馭
上賓搶地呼天攀號莫及敬思 皇考御宇三十年宵旰憂勤萬
幾鮮暇舉凡敬 天法 祖勤政愛民文德武功不可殫述至於
覃敷闡澤軫念痼瘼各直省偶遇偏災發帑蠲租 恩膏立沛
以及籌思積貯廩念河防無非爲保衛蒼生之計 深仁淪浹凡
有血氣者其悲哀自必出於至誠朕泣血椎心尙忍言乎惟念付
畀至重凡所以勉紹 前猷仰承 先志者實藐躬之責兢兢在
疚惶懼日深朕忍痛抑哀兢兢業業尙賴內外文武大小臣工共
矢公忠弼予郅治至喪服之制欽奉 皇考遺詔令依舊制二十

七日而除朕心實所不忍仍當恪遵古制敬行三年之喪庶幾稍盡孺慕之誠至於郊廟祭祀大典自不應因大喪而稍略其禮其應如何遣官恭代及親詣行禮之處著各該衙門查照向例集議以聞其天下臣民應持服制仍照定例行○命禮親王全齡定郡王載銓吏部尚書文慶工部尚書特登額恭理喪儀○戊申諭內閣載銓文慶見已改派恭理大行皇帝喪儀前經派令前往昌西陵備料興工之處著改派魏元烜吉倫泰會同靈桂彭蘊章前往敬慎將事○諭據鄭祖琛奏剿捕楚匪屢獲勝仗見仍嚴密訪捕一摺湖南餘匪竄入楚粵之交叢山峻嶺東突西衝勢甚猖獗經該撫督飭文武員弁疊次殲擒屢獲勝仗該匪等無路可奔逃回深崗尚復踞險以守當此賊勢窮蹙正可乘機追剿以期淨絕根株前有旨令裕泰帶兵督辦不日當可抵界著鄭祖

際仍嚴飭文武員弁會同楚兵分路督剿其要隘處所確探路徑
奮力夾攻首犯李沅發及緊要各犯久稽顯戮務卽設法搜擒毋
令漏網○添派賓親王仁壽瑞郡王奕誌戶部左侍郎阿靈阿工
部左侍郎翁心存恭理喪儀○己酉諭內閣朕恭讀 硃諭遺命
四條內除無庸建立 聖德神功碑及斟酌各件供奉收貯謹當
遵行外至 諭令無庸 郊配 廟附二條事關尊崇鉅典朕不
忍遽從不敢遽定著王大臣會同九卿翰詹科道敬謹詳晰妥議
具奏○諭 大行皇帝梓宮理宜殯宮移奉因念圓明園爲 皇
考多年聽政之地況 皇祖妣梓宮見暫奉綺春園自以近依
慈靈乃隱慰 在天之孺慕雖乾隆年間存記有正大光明殿不
可改換黃瓦之 諭然禮貴因時孝先承志謹卽定於圓明園正
大光明殿敬設 几筵蠲吉二月初二日卯時舉行奉移典禮所

有應行事宜著各該衙門敬謹豫備俟奉移後朕卽以圓明園之
飛雲軒爲倚廬以便朝夕侍奠用申哀悃○庚戌諭內閣朕惟自
古帝王功德丕著必有隆稱顯號昭示無窮此萬世不易之典也
欽惟我 皇考 六行皇帝御宇三十年來寅畏嚴恭憂勤惕勵每
歲 郊壇之祀 躬親昭格展敬 陵 廟盡制盡倫遇 皇祖
考仁宗睿皇帝 皇祖妣孝淑睿皇后忌辰必追感灑泣孺慕終
身侍奉 皇祖妣大行皇太后娛志承歡尊養兼至 大孝肫誠
實千古所未有至於 聖謨廣運勤勞萬幾 御極之初卽頒
手諭嚴聲色貨利之誡一切游觀玩好概從屏斥自居潛邸 智
勇邁倫 躬御神槍殲除賊匪嫺騎射而發必中的詰戎兵而備
豫不虞戡定西陲剿擒逆裔四城克復一鼓蕩平綏藩服而琛賫
偕來柔遠人而烽煙永息愛民如子一視同仁偶值偏災恩膏立

沛蠲租發粟惠澤滂流肆赦省刑好生德洽整飭吏治敦睦宗支
獎忠節而篤勳耆育人才而厚風俗 天心助順有感必通眾志
成城無思不服凡此難名之美善宜揚盛典於 尊親顧予沖人
嗣膺大統雖 聖德極謙沖之致而永懷承 佑啟之恩詳考彝
章宜升 謚號著大學士九卿敬謹擬議以聞○諭各省督撫鹽
關向有進呈方物朕見在諒陰之中食處皆所不安著通諭各省
督撫鹽政織造關差等一應貢獻概行停止卽食品亦不准進呈
俟三年之後再候諭旨○諭朕弟奕訢著封爲恭親王奕譞著封
爲醇郡王奕詝著封爲鍾郡王奕誨著封爲孚郡王百日釋服後
俱加恩准其戴用紅絨結頂冠朝服蟒袍俱准用金黃色○命議
行三年喪卽羣臣以日易月之請○諭道光二十六年三月 皇
考特降 諭旨以二名不偏諱將來繼體承緒者上一字仍舊無

庸改避亦無庸缺筆其下一字應如何缺筆之處臨時酌定以是
著爲令典朕敬遵 成命將御名上一字仍舊書寫毋庸改避下
一字著缺寫末一筆書作訖字以示改避之意其奉旨以前所刻
書籍俱無庸議○諭止各省將軍督撫提鎮及學政鹽關織造等
來京叩謁 梓宮○諭扎薩克等處游牧蒙古王公台吉等及回
子伯克俱免來京○辛亥諭內閣朕惟致孝務極夫尊崇隆稱必
臻夫美備欽惟 孝穆皇后 孝愼皇后 孝全皇后作配 皇
考懋著坤儀 孝全皇后誕育朕躬親承顧復 懿德咸孚於宮
壺 徽音永式乎邦家朕追念 恩慈彌殷感慕茲恭上 皇考
大行皇帝尊諡宜並追崇敬上 尊諡用展孝思式垂萬禩該衙
門詳察典禮具奏○諭朕長兄大阿哥早年薨逝 皇考深爲悼
惻蒙 恩追封多羅貝勒今朕嗣承大位緬維同氣倍切愴懷著

晉封爲郡王其有應行典禮著宗人府會同禮部內務府酌議具奏○諭軍機大臣等據馮德馨奏餘匪竄回湖南添派官兵堵捕一摺前已有旨交裕泰馳往督辦矣又據奏稱拏獲癩子山糾搶匪徒首夥多名著馮德馨嚴行究審從重懲辦並著督飭文武員弁將該處山內藏匿及竄逸他處各餘匪認真搜捕務期全數弋獲不准一名漏網以期盡絕根株儻捕拏不力致畱餘孽貽患將來一經發覺該督等其何以副大行皇帝簡任厚恩耶將此由四百里諭令知之○壬子以王大臣等援喪服舊章籲請定縞素百日仍素服二十七月○癸丑頒大行皇帝遺詔○諭內閣朕長兄大阿哥昨已降旨追封郡王因思二阿哥三阿哥早年殤逝均係朕兄誼切同懷追念實深悼惻二阿哥三阿哥均著追封爲郡王應行典禮著宗人府會同禮部內務府酌議具奏○甲寅

諭內閣 皇貴妃侍奉 皇考淑慎素著允宜加崇稱號以申敬
禮謹尊封爲 康慈皇貴太妃所有應行典禮各該衙門察例豫
備屆期蠲吉舉行○諭 皇考大行皇帝妃嬪承侍宮闈恪恭淑
慎均宜加崇位號以表尊榮 琳貴妃謹尊封爲 琳貴太妃
常貴人晉封爲常嬪 佳貴人晉封爲佳嬪 彤貴人晉封爲彤
嬪 成貴人晉封爲成嬪 祥貴人晉封爲祥嬪 順常在晉封
爲順貴人 蔡答應 尙答應 李答應 那答應並晉封爲常
在所有應行事宜著各該衙門察例具奏○諭惇郡王奕諒著加
恩在內廷行走百日釋服後仍准其戴用紅絨結頂冠朝服蟒袍
俱准用金黃色○乙卯 上詣 大行皇帝几筵前行殷奠禮○
諭內閣 如皇貴妃承侍 皇祖多年屢經 皇考加崇位號見
在年齒最尊允宜特晉隆稱以申敬禮謹尊封爲 如皇貴太妃

所有應行事宜該衙門察例具奏○諭上年南河吳城七堡啟閉不能如法以致河湖受淤軍船回空遲滯當將河督楊以增等一併交部嚴加議處經該部分別議以降調革職仍令福濟等將是否不誤歸次情形詳查覆奏茲據奏稱回空軍船見均陸續歸次受兌比較嘉慶十四五年新漕尚可趕辦並將各河挑挖深通俾清水易於攻刷楊以增著加恩改爲降四級畱任陸建瀛著加恩改爲降二級畱任均不准其抵銷淮揚道查文經著卽照部議革職並照該侍郎等所議工費分別開銷罰賠另片奏參各員等語所有玩視塘河要工又復遲誤之署外南營豐北守備張上著卽革職枷示河干以昭儆戒督催不力之參將呂邦治遊擊安振業均著交部議處署外南同知海阜同知婁晉於灌塘事宜尙能慎重無誤其前參暫行革職之案著加恩開復○諭年班來京之御

前行走科爾沁土謝圖親王等二十七日釋服後卽回原牧○戊午頒 大行皇帝遺詔於朝鮮琉球暹羅越南緬甸等國○己未上卽皇帝位於太和殿遣官告祭 天 地 太廟 社稷是日詣 大行皇帝梓宮前行祭告禮更禮服詣弘德殿 皇貴太妃前行禮出御殿受朝頒詔天下以明年爲咸豐元年加恩中外罪非常赦所不原者咸赦除之○庚申大學士九卿等恭擬上大行皇帝 尊諡徽稱曰 效天符運立中體正至文聖武智勇仁慈儉勤孝敏成皇帝 廟號曰 宣宗天下萬世稱曰 宣宗成皇帝奏入 上曰廷臣所擬詳慎公允於 皇考建中立極之宏模洵相符合深協朕懷○諭內閣朕惟禮先報本徽稱務極乎尊崇義在制宜孝思不過夫典則雍正十三年 皇曾祖高宗純皇帝恭加上 列聖 列后尊諡曾欽奉 聖諭崇先特典後世

子孫不得奉爲成式是以我皇考大行皇帝於嘉慶二十五年
恭加上列聖列后尊諡於列聖尊諡已加至二十二字者
未敢復議加上列后尊諡已加至十六字者亦未敢復議加上
朕紹承大位祇遵成憲敬念詒謀其有列聖尊諡未加至
二十二字列后尊諡未加至十六字者均宜恭議尊崇顯揚盛
美該衙門詳稽典禮敬擬奏聞尋奏仁宗睿皇帝尊諡謹擬經
武下加光裕二字曰仁宗受天興運敷化綏猷崇文經武光裕
孝恭勤儉端敏英哲睿皇帝孝賢純皇后尊諡謹擬徽恭下加
康順二字曰孝賢誠正敦穆仁惠徽恭康順輔天昌聖純皇后
孝儀純皇后尊諡謹擬端恪下加敏哲二字曰孝儀恭順康裕
慈仁端恪敏哲翼天毓聖純皇后孝淑睿皇后尊諡謹擬慈懿
下加敦裕二字曰孝淑端和仁莊慈懿敦裕光天佑聖睿皇后

得旨是○諭朕紹承大位自應敬避

皇考大行皇帝聖諱惟宮

殿廟宇舊名及省郡州縣名印宜如何分別避易之處著禮部詳
慎妥議具奏○諭朕元妃薩克達氏應追封爲皇后所有應行典
禮該衙門察例具奏○癸亥諭內閣王大臣會同戶部遵議清查
各省倉庫章程著照所擬辦理惟有治法貴有治人各直省州縣
經此次清查以後自應痛除積習力杜新虧但恐不肖官員以爲
寬其既往妄冀恩可倖邀圖便己私仍前飲法何以肅綱紀而儆
官常特再明諭各督撫大吏督率藩臬道府正己率屬隨時認真
稽覈不憚煩勞不避嫌怨查有劣員因循玩泄漸致新虧視憲典
爲具文者立即嚴行參辦儻該督撫等毫無覺察或甘爲徇庇經
朕訪聞確實不但本員應置重典定將該管各上司從重治罪朕
惟知仰遵 諭旨法在必行決不寬貸也將此通諭知之

二月甲子朔 上詣 大行皇帝梓宮前行啟奠禮○乙丑移奉

大行皇帝梓宮於圓明園正大光明殿 上哀號瞻戀不忍暫

離每日親詣奠獻奉 皇貴太妃居永春室 上居飛雲軒苦次

每日恭詣問安○丙寅大學士穆彰阿等遵旨謹擬崇上 孝穆

皇后尊諡曰 孝穆溫厚莊肅端誠孚天裕聖皇后 孝愼皇后

尊諡曰 孝愼敏肅哲順和懿熙天詒聖皇后 孝全皇后尊諡

曰 孝全慈敬寬仁端慈符天篤聖皇后得旨是○遣官祭 歷

代帝王陵 孔子闕里 長白山 松花江 五嶽 四鎮 四

瀆○溶江蘇丹徒丹陽二縣運河○戊辰添派左都御史柏葰內

務府大臣基溥恭辦 昌西陵工程○己巳 上詣正大光明殿

大行皇帝几筵前行初祭禮○諭內閣朕泣讀 皇考大行皇

帝硃筆遺諭訓誡精詳懇至伏誦悲愴慟深五中 諭令毋庸升

配升祔二條事關明禋鉅典天下萬世觀瞻所繫是用博諮廷議
令王大臣等會同九卿翰詹科道詳考典禮務求至當茲據集議
以聞聿稽周人郊祀后稷以來唐宋及明或三祖並侑或數帝分
配我朝 聖 聖相承均經升配 郊壇永崇禋祀第配位遞增
而 壇壝之規制有定敬繹 殊諭若世世視爲成例率行無已
豈止有背於古訓更難示信於後人再四籌思不能不定以限制
仰見 聖德謙光超邁前古而所以爲萬世慮者至深且遠今禮
親王全齡等所奏謂宜仍遵 列聖成憲朕詳加披閱因思尊崇
之典莫大於嚴 父配 天如我 皇考之德澤彌綸同符 列
祖而遽停升配雖係仰遵 遺命朕心究有難安展轉詳思應照
王大臣所請 郊壇大祀俟祔 廟禮成後恭奉 皇考神牌升
配並曲體 遺訓定以限制嗣後 郊祀配位歷億萬年總以

三祖 五宗爲定自朕躬而下不復舉行並恭錄 皇考硃諭首
條及朕此次諭旨懸奉 南郊齋宮垂示久遠著爲成式世世遵
循罔數萬不准再議更張則非徒朕克展孝思實於 皇考之功
德允稱而於 貽謀垂裕訓迪周詳之意亦庶可稍慰矣禮經三
昭三穆與太祖之廟而七宋儒朱子謂百世不祧之廟如周之文
武世室商之成湯三宗不在數中則天子七廟特禮之常制非合
不祧之室而言我 皇考功德隆盛允宜祔 廟稱宗應恭俟
山陵禮成後祧奉 神主升祔以致孝享而盡尊崇凡此仰稽
舊典俯順輿情 聖謨洋洋萬世所當效法而朕權衡審慎務求
協乎天理人情之至以下副四海臣民尊親愛戴之公心惟我
皇考在天之靈當亦默垂鑒格也所有應行典禮各該衙門屆時
敬謹詳察具奏將此宣諭中外知之侍郎曾國藩所奏頗有是處

其餘京堂及科道等所奏各抒己見殊少折中各摺均著發還○
怡親王載垣等奏召對時與陳孚恩語言辯論舉措失儀自請嚴
議得旨爾等雖失小節究屬忠悃之誠陳孚恩雖爲廣言起見於
大體實屬乖謬仁壽載銓載垣端華僧格林沁陳孚恩均著一併
交各該衙門議處尋議上得旨仁壽等著罰俸六箇月准其抵銷
陳孚恩著降三級畱任准其抵銷○庚午 上詣綺春園迎暉殿
大行皇太后几筵前供奠越庚辰乙丑己亥皆如之○辛未

上詣正大光明殿 大行皇帝几筵前行大祭禮自是閒日親詣
奠獻○諭內閣朕仰承 皇考付託之重兢兢圖治深恐幾務紛
繁措置未能悉當敬念 列聖御極以後俱頒 詔旨求言蓋一
人之聰明智慮或有未周必公聽並觀而後上下之情通措施可
期於允協矧朕德薄何敢不虛衷延納博採讜言特此通行曉諭

凡九卿科道有奏事之責者於用人行政一切事宜皆得據實直陳封章密奏俾庶務不至失理而民隱得以上聞諸臣務須虛公詳愼毋偏毋私凡有裨於官方吏治國計民生者各抒所見切實論奏以副朕集思廣益之至意○諭軍機大臣等所有道光三十年以前緣事降調革職及遣戍釋回已未錄用文武各廢員除業經病故及已復原官者毋庸議外餘著該部查明原案開具簡明事由分繕清單呈覽○壬申諭內閣朕恭讀

大行皇帝祇謁

西陵時畱貯

龍泉峪正殿存記奉

硃筆敬瞻東北永慕無窮

雲山密邇嗚呼其慕與慕也欽此仰見我

皇考感念松楸孝思

不匱用垂

遺訓昭示來茲朕抱痛終天期先繼

志望

佳城

而悲愴觀

手澤之如新尋繹再三彌深感慟所有

龍泉峪陵

名應卽敬稱

慕陵朕當和淚濡墨敬謹書寫命武英殿選工鐫

刻以彰 聖孝而慰 先靈○癸酉諭軍機大臣等向來奉安

山陵例由禮部奏派大臣官員前往守護恭查道光二十八年欽奉 上諭此例著永遠停止交軍機大臣敬謹存記著傳知禮部恪遵辦理○諭本日據裕泰馳奏查探逆匪竄赴廣西裹脅漸多見派官兵分投迎剿又據鄭祖琛馳奏湖南匪徒竄入粵境見在籌辦情形各一摺並據鄭祖琛片奏咨會湖南貴州分投截剿等語此次湖南匪徒滋事先經竄入廣西經該省官兵擊退竄回若使湖南兵勇得力何至復由城步翻山竄至龍勝一帶因思該匪等如此竄擾實由湖南省文武各官圍捕不密所致目下匪黨益肆兇殘湖南員弁尙皆觀望不前而粵省文武乃能不分畛域越境窮追以致瑪隆阿奮勇捐軀湖南各官捫心自問其能靦顏無愧乎見在該匪等四路奔竄該處山徑叢雜若非各省協力兜拏

必致乘閒逃逸裕泰接奉此旨務當激發天良會同鄭祖琛督飭
兵弁激勵紳勇解散脅從併力夾攻其龍勝一帶見無提鎮大員
著廣西提督閔正鳳卽日馳往以期堵剿得力至湖南之長安堡
等處可通懷遠之沙宜並通貴州永從等處該匪已欲覓路逃往
尤不可不嚴爲防堵並著喬用遷遴委員弁在於界連湖南地方
督率兵勇認真堵截斷不可令其竄逸本日已有旨將向榮調補
湖南提督計日可至永州鎮一缺裕泰卽於孫應照谷蘊燦二
員內揀選奏請補用裕泰統轄兩省當此防剿失機匪蹤日肆之
時若再不奮力殲擒致使蔓延爲害該督其何顏以對鄰封文武
及兩省士民耶鄭祖琛喬用遷久任封圻目擊鄰匪衝突亦必憤
切同仇協剿不遺餘力當無俟朕諄諄告誡也將此由四百里諭
知裕泰鄭祖琛喬用遷並諭令閔正鳳向榮知之○以調度乖方

革湖南提督英俊永州鎮總兵官雙德等職仍畱剿賊○予廣西陣亡參將瑪隆阿祭葬世職○甲戌 上詣綺春園迎暉殿 大行皇太后几筵前行再周月祭禮○乙亥頒闕里文廟暨太學各省府州縣學 御書扁額○丙子 詔開恩科於咸豐元年舉行鄉試二年舉行會試○丁丑 上詣正大光明殿 大行皇帝几筵前行周月祭禮○諭內閣直省司道府廳州縣以及營伍員弁內各督撫見聞所及隨時察看自必知之最悉如查有才德兼優誠心任事確有實據者著出具切實考語秉公具摺酌保數員候朕簡用歷任後除公罪不論外如有作奸犯科身罹私罪惟該保之督撫是問其有貪婪不法以刻爲明或年老昏憤不能辦事者亦著據實參奏不准姑容爾督撫等均受 皇考深思簡用封疆大吏各矢公忠爲國爲民毋稍瞻徇冒濫用副朕整飭官方至意

○戊寅諭內閣惠親王係朕之叔內廷召對與朝會迥不相同若動輒叩拜與諸臣略無區別朕心實有不安嗣後除朝會大典仍遵定例行禮其尋常召對以及三年後內廷宴賚均無庸叩拜至

宮中祭

神賜食祭肉禮應向

上叩拜惟不必於朕前隨眾

行禮遇有賞賜物件著具摺謝恩無庸當面叩首以示朕敬長親親之至意○己卯賞工部尚書杜受田太子太傅銜其父前任禮

部侍郎壻

御書扁額○

庚辰諭內閣沿海各省設立水師營汛

遇有洋匪竊發巡邏緝捕是其專責見據御史王本梧奏浙省水師廢弛已極兵則怠惰偷安官則因循推諉且有吸食鴉片煙者閒或搜捕零匪塞責遇大幫洋盜不敢過問等語水師營務積久廢弛勢所不免緝捕之要首在整飭舟船礮械嚴杜奸民接濟而總在將弁得人方足勵戎行而收實效著通飭沿海各督撫按照

該御史所陳六條覈實辦理並督飭弁兵按期出洋會哨不准虛應故事儻查明將弁中有怯懦無能視巡洋爲畏途者卽行據實嚴參懲治總期督率得人於巡邏緝捕認真講求庶盜風寢息商旅安行洋面可期靜謐矣將此通諭知之○辛巳諭軍機大臣等有人奏湖南寶慶賊匪滋事上年冬閒疊據該撫馮德馨奏報剿辦情形均經大行皇帝諭令安速剿辦勿使竄逸蔓延乃馮德馨不知仰稟廟謨屢誤機會由長沙前往寶慶十二日之久僅行三百里該撫旣畏葸不前以致官兵皆不用命賊眾直衝永州營之前鎮軍營之後搶掠器械而逃兩營無一人敢撓其鋒又該撫於賊逃之後謬以收復城池入奏且言教官典史尙無下落殊不知兩學教官均在城內無恙是其於城內官之存亡亦不能探問眞確徒因賊眾已逃率以凱撤入奏歸途州縣辦差稍不如意

大爲震怒及至後來賊勢復振乃倉皇自請處分各等語若如所奏馮德馨身任封圻於軍務緊急之時任意遷延貽誤匪淺著裕泰按照所奏情節逐款詳查據實參奏斷不准稍涉徇隱原摺著鈔給閱看至巡撫大員已經查辦其擁兵不行捕賊之武職大員更非尋常失事可比著卽遵 大行皇帝諭旨一面拏問嚴訊一面具奏馮德馨見已批准來京如有應質對之處著卽傳旨扣留裕泰見已馳抵軍營其應如何按捕流匪諒必曾有成竹迅速辦理斷不可再失機會致令賊勢蔓延是爲至要將此密諭知之○召馮德馨來京以萬貢珍署湖南巡撫春熙署湖南布政使署○壬午諭軍機大臣等裕泰馳奏逆匪復由廣西竄赴楚境暨貴州交界地方飛咨派兵防剿一摺據稱餘匪見已竄入三省交界地方叢林峻嶺路徑分歧東奔西突此拏彼竄且據見獲賊匪

供稱匪黨已有一千數百餘人首要五人其首犯卽係李沅發若
不會合兜拏必致蔓延爲患此次流匪已經廣西兩次堵截若使
湖南兵勇得力何至蔓延裕泰已抵軍營責無旁貸不得聽信劣
屬蒙稟遽謂匪徒四散仍當首先出力設法嚴剿並著鄭祖琛喬
用遷迅速多派官兵不分畛域分投堵截一面多方曉諭散其會
匪黨與毋任勾結苗搖並激勵紳勇懸賞購綫務將李沅發及首
要各犯剋日殲擒如被脅之人有將要犯縛獻者除重賞外仍應
量減其罪總期犯無漏網餘黨悉就殲除不至復有竄擾之虞方
爲不負委任將此由五百里各諭令知之○癸未命恭纂 大行
皇帝實錄○諭內閣陸建瀛奏請立限清查運庫一摺兩淮鹽務
近年商引滯銷以致庫款支絀若竟任其那墊套搭必且寢成虧
空亟應趕緊清釐確求辦法所有兩淮運庫款目准其子限半年

責成該督遴派妥員逐款鉤稽仍令分別商欠官虧勒限從嚴參追不准稍有姑容該督職兼鹽政責無旁貸務當認真覈辦俾舊弊悉清新虧永杜以重帑項而肅鹺政○丙戌 上詣綺春園迎暉殿 大行皇太后几筵前行清明大祭禮○詣正大光明殿

大行皇帝几筵前行清明大祭禮○以杜翮爲內閣學士

由詹事選○

庚寅諭軍機大臣等昨日據鄭祖琛閔正鳳馳奏楚匪竄擾戕害備弁逃回楚境仍飭兵勇追剿並將擒獲要犯先行正法一摺所辦甚屬可嘉湖南逆匪滋事疊次竄往廣西龍勝等處均經該省文武督率兵勇奮力攻擊屢有殲擒雖將備弁兵閒有傷亡究係認真堵禦迫險立功乃湖南省竟未剿捕疊經裕泰馳奏未據聲敘殲擒若干不過舉其大概情形鋪張聲勢一奏塞責是湖南將弁之不能調度兵勇之不能用命已可概見見在賊匪業已竄至

湖南通道縣屬該處路通貴州若不亟籌堵剿深恐勾結苗猺蔓延日甚裕泰業已馳抵武岡州著仍遵前旨散其黨與激勵紳勇認真按捕務將首要各犯迅就殲擒儻再遷延觀望任聽庸劣將弁畏葸不前貽誤事機試思統轄兩省責無旁貸其能當此重咎否耶至匪蹤逃逸靡定並著鄭祖琛喬用遷閔正鳳各遵前旨多派弁兵分投截拏尤在杜其勾結庶可剋日殲除諒該撫等必能不失機宜也將此由四百里各諭令知之○諭寄諭伊犁將軍薩迎阿等御史張廷瑞奏新疆兵餉請酌量變通一摺新疆底定幾及百年歲調兵餉百餘萬該御史所奏屯田宜行開墾宜廣杜奸民之影射改換防之兵丁於國計民生大有關繫著該將軍等將所陳四條通盤籌畫酌量變通會同妥議具奏原摺著鈔給閱看將此諭令知之○壬辰頒 御筆夏答倭仁手詔示大小臣工曰

夫言不逆耳不爲諫今倭仁之言其庶幾歟然時異勢殊或有難於必行者如彼引程顥所云擇天下賢俊使得陪侍法從名雖甚善而實有難行賢俊之士或有才而無德曰與習者非翰墨之場卽馳騁之樂反不如以禮相接互相儆戒之爲善矣至於所言辨君子小人之分洵爲切直之言朕虛懷納焉嗣後凡大小臣工尤須以國計民生爲重有所見聞剴切直陳以倭仁之直諫爲法豈非朕之幸歟○諭軍機大臣等裕泰馳奏賊匪竄聚黔楚交界見復添調官兵並分派將領相機進剿一摺據稱賊匪大隊屢次衝突雖經該處兵勇殲擒多名該逆熟諳山徑屢從閒道逸出焚搶村市戕害官兵等語該匪見已竄聚黔楚交界山內若不乘機堵剿致令四出奔突爲害何可勝言惟統兵貴專責成軍餉尤應籌裕本日已由五百里寄諭調任提督向榮飭令兼程前赴軍營並

飭徐廣縉等迅卽籌撥銀二十萬兩委員星夜解交軍營以濟要需如兵力尙單應如何添調官兵著裕泰酌量檄調總期兵精糧足一鼓作氣掃蕩餘氛且有廣西貴州追擊堵截趁此機會四路進剿使該逆腹背受敵自無難聚而殲旃全在該督詳察形勢激勵弁兵紳士同心勦力勿失機宜勿存畏蕙儻不知振作坐使逃竄蔓延糜餉勞師該督身罹重咎非惟無以對朕其何以副 皇考簡擢重任耶懍之勉之將此由五百里諭知裕泰並諭向榮知之○諭前已有旨著向榮調補湖南提督命其速赴新任見在湖南剿匪軍務緊要該提督接奉此旨著卽兼程迅速前赴湖南軍營毋稍遲滯○撥廣東司庫銀二十萬兩備湖南軍需○是月貸駐紮災區江蘇京左等二十八營一季餉銀

東華續錄

咸豐二

臣王先謙敬編

臣陶潛宣恭校

三月癸巳朔恭上 大行皇太后尊諡曰 孝和恭慈康豫安成

應天熙聖睿皇后○兵部尚書保昌卒贈太子太傅予祭葬諡敬

信○以柏葭爲兵部尚書

由左都御史遷

○甲午以恭上 孝和睿皇后

尊諡禮成頒詔天下覃恩有差○以花沙納爲左都御史調瑞常

爲吏部左侍郎恩華爲兵部左侍郎廣林爲工部左侍郎以瑞麟

爲禮部右侍郎

由內閣學士遷

○乙未詔各省實行保甲廣建社倉並整

頓營務嚴除弊端○丙申協辦大學士陝甘總督琦善奏懇節哀

瀝陳下悃得旨爾惟於陝甘弊政實力整頓破除情面痛改積習

尤須慎爾廉隅慎終如始庶不負 皇考再造之恩未有己不正

而能正人者勉之慎之○丁酉諭內閣御史陳枚奏病民積弊一摺課吏之法以去害民者爲先各省漕務積弊久經禁革如該御史所奏州縣不恤民困多有借催科爲股削者當此整飭庶政之時該督撫首當痛戒屬員務各湔除痼習毋得浮收勒折與小民升斗相爭至鹽法先在恤商若以招商病民勢必望風退避於國課殊有關繫非大吏秉公覈辦將何以整肅鹺綱耶其尤爲害民者莫如縱蠹縱賊兩端若不明察暗訪將貪劣玩縱之員嚴參民何以安如有吏役把持公事以及盜賊窩蔽著各督撫實力懲辦不得因循玩忽自干咎戾將此通諭知之○諭軍機大臣等有人奏貴州苗匪肆劫上年十二月間有雲南舉人王湜等九人同行至黃平州遇苗匪百餘人持械攔截銀物一空家丁人夫並皆身受械傷實緣黔省苗匪糾聚愈多不但商民時被劫殺且有焚掠

鄉村淫擄婦女之事大吏意存消弭州縣瞻徇不理等語若如所奏貴州地居竄遠苗匪抗官藐法擾害閭閻莫此爲甚著喬用遷接奉此旨迅飭文武員弁按照所奏情節嚴密偵緝務期賊賊並獲大加懲辦其有聚眾滋事難以理論者並著設法解散勿令養癰貽患儻延案不辦仍致搶掠肆行卽將辦理不善之地方官從嚴參懲斷不准姑容取咎懷之愼之原摺著鈔給閱看將此諭令知之○辛丑諭內閣本日據裕泰由四百里馳奏官兵獲勝賊勢窮蹙見在催兵防剿一摺據稱本年二月十四日賊匪竄靖州哨團地方經護提督孫應照派令千總哈沁發等帶領兵勇槍械兼施殲斃多名並生擒夥匪吳志全等三名十六日夜追至大石橋地方擊斃賊黨二十餘人生擒謝安南等十五人游擊李英等於十九日馳抵地平突有賊匪四千餘人分作二隊撲擁前來我兵

兩路夾攻賊始大潰共計斃羈賊眾五百餘名見在賊多逃散勢甚窮蹙等語該逆等始據城池抗拒官兵繼復肆行竄擾屢戕官兵殊堪痛恨見在我兵旣獲勝仗正可乘此機會大振軍威翦除黨與迅將首要各犯盡數追剿其脅從之人儻止隨行並無助虐之事務當迅明解散如有將脅從老幼割級獻功反致正賊漏網一經發覺定將冒功之人治罪至剿辦初次得手尤須倍加小心斷不可因偶獲勝仗稍涉驕惰其粵黔兩處防堵亦勿稍形弛懈總期同心効力將賊匪剋日蕩平以靖邊圉而安黎庶○諭軍機大臣等本日據戶部遵議陸建瀛奏准饒興利除弊一摺據原擬各條如按舊科則酌減外費酌復額引加帶乙鹽均以輕成本而恤疲商永禁整輪覈實岸費以及刪除繁文務歸簡易亦與從前奏案相符至改捆鹽包以剔除弊混分年批補以調濟災商均屬

妥協已依議行矣惟分岸運銷一層水販領照之後不由地方文武員弁稽查能否不致越界浸灌有礙鄰省引地且改運九江已寓行票之意如何杜絕奸商不令詭名領票致鹽引虛懸回課無出事窮則變固不能拘泥舊章而勘始之時必須熟籌全局爲可大可久之計其綱食科則請歸一律官定場價以免居奇兩條亦皆議改章程有無窒礙殊難懸揣該督身膺重寄當國用支絀之時獨能不避嫌怨力籌整頓於淮鹺疲極之秋籌補偏救弊之策但於此三層果否確有把握可以久行無弊並如何嚴禁竈私均未據確實指陳著該督博採旁諮秉公妥議具奏又戶部片奏裁費爲救弊要著淮南與漢岸必須相助爲理設在任不肖官吏藉詞掣肘相率阻撓是名爲革除浮費而仍託諸空言安望日有起色著陸建瀛咨商各該督撫不分畛域督飭所屬實力會辦務須

破除情面不顧己私一洗向來惡習是爲至要前據給事中曹履泰奏請復窩單以符舊制並陳利弊八條一摺於見在辦理情形有無可以採擇之處著鈔給閱看該督肩此鉅任責無旁貸朕深加倚賴惟當堅持定力認真辦理中飽之弊亟應禁革所論裁減浮費必不便於貪蠹官吏儻有掣肘阻撓之員卽行參辦但須著有成效方爲不負委任設將來並無起色甚至日見疲敝朕惟該督是問將此諭知陸建瀛並諭令裕泰王植費開綬知之○壬寅諭內閣前據禮部遵議 皇考大行皇帝聖諱上一字擬以靈明字樣改避下一字擬以安定靜康字樣改避今據大學士耆英奏稱天下有郡州縣名印以下一字誌禎祥者甚眾四海臣民藉獲嘉休似可仍遵嘉慶二十五年欽奉 諭旨中間避寫一畫一撇與 高宗純皇帝聖諱下一字避從止字之 命意相合等語著

照所請所有宮殿廟宇舊名及各省地方官名均著毋庸改易凡奏章文移遇有援引宮殿地方官名 聖諱上一字卽照禮部所擬以靈明二字恭代遇下一字仍遵 聖諭中閒避寫一畫一撇不從心字毋庸以安定靜康四字代易非此概不准用仍應敬避該部卽行通飭一體敬謹遵行○諭通政使羅惇衍所奏甚是臚陳往蹟勛朕以學實出自愛君之誠庶慰朕求諫之心其奏請保舉京員及廣開言路等語外省司道以下文武各員降旨令各督撫等保舉以備簡用至在京部院各衙門例有京察截取保送京堂御史等官該員等身受 皇考重恩天良具在斷不至有蔽賢之患著再飭諭在京部院大臣各舉所知果有品學純正才德出眾之員無論京外家居准其保奏均俟召對後再降諭旨設後來名實不符或竟犯有奸贓劣蹟惟原保之大員是問至於督撫擬

鎮學政藩臬本有言事之責惟近來率多循例敷奏於用人行政之大端自顧身家緘默不言藉口於整頓不易卽恐眾怨歸己均未能剴切直陳於政體毫無裨益嗣後各該督撫提鎮學政於政事有關得失者著據實臚陳備朕採擇其藩臬兩司亦許各抒所見密封交本省督撫代爲呈奏以副朕明目達聰集思廣益至意○賞前任陝甘總督布彥泰二等侍衛爲葉爾羌幫辦大臣○癸卯諭內閣左副都御史文瑞奏陳四事朕詳加披閱所論剴切眞摯深協朕懷並錄進乾隆元年左都御史孫嘉淦三習一弊疏其論爲君之道洵屬切直精深堪爲聽言臨政之助臺端爲言路表率文瑞首進讜言朕虛懷納受諫九卿科道斷不緘默畏蕙負朕諄切求言之意也○諭禮部侍郎曾國藩奏陳用人三策朕詳加披覽剴切明辯切中情事深堪嘉納連日左副都御史文瑞大理

寺卿倭仁通政使羅惇衍等各陳時事朕皆降旨褒嘉其通政使司副使王慶雲鴻臚寺少卿劉良駒及科道等摺均分別准行交議如該侍郎摺內所請保舉人才廣求直言疊經降旨宣示諒內外大小臣工必能激發天良仰體虛懷弼予郅治惟便殿日講爲求治之本我聖祖仁皇帝登極之初卽命儒臣逐日進講無間寒暑朕紹承丕業夙夜孜孜景仰前徽勉思繼述著於百日後舉行日講所有一切應行事宜著各該衙門察例詳議以聞○甲辰諭內閣鄭祖琛閔正鳳馳奏楚匪竄至粵界官兵大獲勝仗一摺此次楚匪竄入三省交界地方分投滋擾拒捕戕官前經裕泰奏獲勝仗賊膽已落本日復經鄭祖琛奏報疊次接仗大挫賊鋒官兵紳勇志切同仇奮勇爭先不遺餘力所辦甚屬妥協鄭祖琛閔正鳳調度有方均著交部議敘其餘在事文武員弁有始終

尤爲出力者酌保數員候朕施恩毋許冒濫該撫惟當振作精神
激勵士卒會同楚黔官兵同心協力將逃散餘匪盡數殲擒切不
可稍涉驕惰以靖邊疆而安黎庶○丙午 上詣正大光明殿

大行皇帝几筵前行再周月祭禮○己酉 上詣綺春園迎暉殿
孝和睿皇后几筵前行百日祭禮○庚戌諭內閣陸建瀛傳繩

勛奏清查未能剋期完竣懇請展限等語江蘇各屬道光二十五
年以後清查倉庫錢糧因勘災查賑未能兼顧案卷閒有漂失藩
司署任未久未及次第句稽著准其展限四箇月該督等卽飭藩
司督同司員上緊逐款查覈趕造各冊迅速肅事不准稍有舛錯
遺漏如再逾限不結隨時奏參毋任延宕以昭覈實○諭軍機大
臣等喬用遷馳奏遵添官兵堵截賊匪一摺此次楚匪竄入黔界
疊經降旨令該撫多添官兵分路堵截茲據喬用遷奏稱黔平府

前後所調兵勇已有四千餘名尙堪驅策並據查明實無苗人出境句結亦無逸盜溷迹等語著仍遵前旨嚴飭官弁激勵士卒迅將首要各犯剋日殲擒一面徧行曉諭散其裹脅俾免日久蔓延儻在事文武稽察不密致有苗蠻盜賊勾通楚匪鳴張爲患朕惟該撫是問恐不能當此重咎也將此諭令知之○辛亥 上詣綺春園迎暉殿 孝和睿皇后几筵前行祖奠禮○諭內閣吏部尙書文慶保舉之直隸宣化府知府炳綱刑部尙書陳孚恩保舉之湖北候補知縣饒拱辰禮部侍郎曾國藩保舉之江南升署淮揚道嚴正基浙江秀水縣知縣江忠源著各該督撫迅卽飭令來京交吏部帶領引見伺候召見○江蘇巡撫傅繩勛奏白茆河年久淤塞海口石牐啟閉不能見功必須移建距海較遠之老牐橋地方見已議定挑辦得旨依議妥辦○以 孝和睿皇后梓宮奉移

昌陵免經過地方額賦十分之五易州十分之七○王子 孝

和睿皇后梓宮發引 上步至大紅橋跪送命惠親王綿愉恭送

昌陵○乙卯諭內閣裕泰奏逆匪在城逃竄文武大員疏於防

範請俟事竣後詳查一招馮德馨身任巡撫遷延貽誤咎無可辭

著卽行革職仍著來京聽候查辦餘著照所擬辦理○湖廣總督

裕泰奏各營官兵會剿新甯縣匪徒見在添調官兵較多需銀接

濟請在司庫酌撥銀九萬兩解濟軍營以供支用下部知之○丙

辰 孝和睿皇后梓宮至 昌陵暫安於 隆恩殿○諭軍機大

臣等有人奏大興縣屬之西營東安縣屬之東營通州所屬之余

家府各地方回民多搶奪勒贖之事天津府城匪徒聚會名曰鍋

夥索擾鋪戶貨船本年正月有拆毀住房一案又定興縣姚村鎮

正日間有錢舖被賊明火持械劫去衣服錢文一案易州東關於

本月有騎馬賊匪百餘人施放火槍打劫布鋪銀兩布疋並砍傷鋪夥三人捆縛數人一案其賊均未弋獲又涑水縣已革武生曹漢廣膽敢嘯聚賊盜主使強劫聞拏拒捕種種不法等語畿輔重地亟宜除莠安良若如所奏是盜賊橫行商民被擾緝捕之不力已可概見不可不急加懲創著卓秉恬陸應穀訥爾經額嚴飭文武員弁迅速查拏從重懲辦如有地方官諱盜彌縫緝捕懈弛分別嚴參毋稍姑息以儆奸宄而安善良原摺著鈔給閱看將此諭令知之○諭南河外南同知婁晉先經楊殿邦奏參該員辦理灌塘事宜甚爲草率奉 旨暫行革職旋據福濟陸建瀛會同楊殿邦楊以增以塘河挑工及灌塘事宜均非婁晉經手卽經加恩開復嗣據楊殿邦奏稱福濟等將婁晉聲請開復係屬歧誤請將婁晉嚴加議處當令福濟據實覆奏據稱前請開復係查照舊章會

同督臣漕臣河臣商辦未敢歧誤是以仍准開復茲有人奏大臣舉劾不應各執意見朕思該督等同在工次自必同有見聞楊殿邦等先嚴參而後請開復福濟所稱循照舊章是否確有例案楊殿邦既已會請開復於前何又獨請嚴議於後種種意見分歧殊不可解著陸建瀛楊殿邦楊以增卽將辦理歧異之故明白回奏毋稍回護將此各諭令知之○以駱秉章爲湖南巡撫張亮基爲雲南布政使梁星源爲雲南按察使

由廣東南韶道遷

○己未諭內閣趙

光奏陳時務四條請亟爲整飭據奏吏治日壞武備不修緝捕廢弛虧空累積均切中時弊至所稱將帥惟耽安逸養尊處優以營卒爲廝役不事操防以空名冒錢糧專事肥己沿海水師率皆畏葸無能等語尤當痛懲其弊著各直省督撫提鎮按照摺內所陳認真講求破除積習務使吏治蒸蒸日上水陸營伍有勇知方除

恭安夏力行保甲並遵照上年王大臣議定清查章程彌補舊欠杜絕新虧以副朕孜孜求治之至意○諭軍機大臣等據大學士潘世恩兵部尚書魏元烺先後保奏前任福建臺灣道降補四川蓬州知州姚瑩才堪簡用請旨徵召等語著王植卽查該員如果在籍並無事故能否來京豫備召見據實具奏將此諭令知之○庚申諭內閣御史長秀奏外藩入貢請肅體制而重懷柔一摺藩服使臣入貢所有到邊過境到京一切備辦供具定例極爲周密自宜恪守成規妥爲備辦方足以昭體制若如所奏貢使在途夫馬缺乏到京供具任意剋扣伴送各員並不慎加遴選殊非撫馭遠人之道不可不亟加整頓著各該省督撫於使臣過境嚴飭所屬務按站妥備夫馬毋令缺乏儻供給之外護送人等藉端夾帶貨物騷擾地方卽著該地方官指名參奏至到京後著光祿寺內

務府衙門嚴飭承辦各員認真查察如於供具賞賜各物查有剋扣情事卽從嚴參處所有派員伴送節經奉旨不准以衰庸之員充數著各該督懷遵 聖訓慎加遴選不得以衰邁庸員率行派委如仍積習相沿致失懷柔之意必將中外司事各員重懲以恤藩封而肅體制○辛酉諭軍機大臣等前因兩淮運司一缺關係緊要曾降旨令陸建瀛於所知道員內酌保候簡前因穆彰阿保奏聯英前在山東運司任內辦理著有成效復有旨令聯英暫署此缺俟簡放有人仍隨同陸建瀛總理鹽務連日召見鴻臚寺少卿劉良駒知係戶部司員出身詢以鹽務甚爲熟悉因卽授爲兩淮運司無非爲整飭鹽課起見惟淮綱之利弊全在楚岸之能否疏銷如楚岸督辦得人則淮綱自必日有起色當此饑務疲敝國課支絀之際必應因地制宜量材器使方期兩有裨益劉良駒到

後聯英卽應交卸運篆著陸建瀛於伊二人內詳加斟酌兩淮
運司旣已實授有人或卽令聯英前赴湖北辦理楚岸事宜或因
劉良駒於兩淮情形尙未深悉先卽委令督辦楚岸鹽務仍令聯
英暫署運篆亦無不可惟在該督隨時察看酌量調度總期用當
其才俾鹽務從此改觀乃爲妥善至分任之中仍有專責聯英劉
良駒自不至罔知振作惟知之匪艱行之惟艱儻劉良駒籌辦鹽
務日久未能協宜該督仍當據實奏請改調斷不可稍有瞻徇致
滋貽誤將此諭令知之○王戌諭軍機大臣等據大學士潘世恩
禮部尙書孫瑞珍工部尙書杜受田先後保奏前任雲貴總督林
則徐又據戶部侍郎朱鳳標奏前任工科給事中陳慶鏞均堪備
簡用請飭令來京各等語著劉韻珂徐繼畲卽查明該員等能否
來京候簡據實具奏將此諭令知之○諭據禮部尙書孫瑞珍保

奏前任兵部侍郎三品頂戴休致戴熙尙堪宣力等語著吳文鎔卽查明該員是否在籍能否來京候簡據實具奏將此諭令知之○禮親王全齡薨予祭葬諡曰愼○是月貸湖南安鄉縣修築隄垸銀福建金門鎮標營兵穀價銀

夏四月癸亥朔諭軍機大臣等據工部尙書杜受田保奏前任漕運總督周天爵堪備簡用等語著陳慶偕查明該員是否在籍有無事故能否來京候簡據實具奏將此諭令知之○甲子諭內閣朕降旨求言原期各抒讜論用資啟沃至大學士身居端揆一言一動皆爲舉朝所矜式凡有建白必應持正酌中方爲無忝厥職乃耆英前奏用人行政理財諸大端朕詳加披閱其於君子小人之辨持論過偏反謂小人且當保全君子亦恐誤事顯違古訓流弊曷可勝言大臣立言不朽方將永垂史乘似此率意敷陳殊於

進言用人大有關係本應交部議處姑念此外所陳各條尙有切於時務之處著英著加恩免其議處仍傳旨申飭○乙丑諭軍機大臣等前據薩迎阿奕山奏查明伊犁塔爾巴哈台喀什噶爾三處貿易情形一摺當交理藩院妥議具奏茲據奏稱俄羅斯於伊犁塔爾巴哈台二處通商既據該將軍等查明尙無窒礙應由該將軍妥議章程以期日久無弊其喀什噶爾一處查明窒礙難行應如所奏毋庸再議等語國家撫馭外夷必期日久相安方能永靖邊陲不至藉端滋事所稱俄羅斯來伊犁通商礙難照恰克圖事例如仿照哈薩克貿易章程辦理庶可相安惟該國甫議通商與哈薩克久經內附者不同所有進卡查明人數與牲畜貨物多寡撥兵接護其貨物或由章京酌量易換或聽其與商民自行易換換贖貨物仍令自行帶回不得藉貨未換完逗遛赴街市置買

食物發給執照限以時刻呈繳有犯罪名應如何覈辦方不至激
生事端必須公同酌議方可永遠照辦著薩迎阿通知該國揀派
大員前來會議妥立章程詳細具奏塔爾巴哈台一處成凱見已
離任札拉芬泰初次履任恐於交易情形未能備悉其詳儻所議
未能妥協必致漸開邊釁所關非細著薩迎阿徑行妥議規條毋
庸會商至應議規條必須體察情形細心妥籌總期日久奉行有
利無弊該將軍卽廣諮博採會同該國悉心商辦斷不可草率定
議是爲至要至喀什噶爾旣據查明窒礙難行自係實在情形著
卽照理藩院所請毋庸再議並將理藩院咨行俄羅斯文底鈔給
閱看將此諭令知之○諭據禮部侍郎曾國藩保奏前任太常寺
少卿因案降調李棠階堪備簡用等語著潘鐸卽查明該員是否
在籍有無事故能否來京候簡據實具奏將此諭令知之○丙寅

諭內閣陸建瀛楊以增奏通籌河湖大局酌請次第辦理一摺據稱挑挖天然引河見已如式完竣補築淮揚運河西隄勒限四月初旬辦結等語著該督等親往查看覈實驗收儻作法未能如式工料稍有偷減卽將承辦各員指名嚴參至所稱添塘避牘卽著緩至秋後籌辦其王營減壩據稱俟重運過竣覆勘固因經費未齊分別次第辦理然轉瞬大汛經臨於減洩盛漲是否確有把握不至誤事著該督等悉心商酌通盤籌畫不得以籌款惟難遂將要工置之從緩也○諭軍機大臣等內閣侍讀學士董瀛山奏弭盜詰奸一摺據稱邪教盜賊在在皆有而避藏之巧蔓延之多惟交界處所爲最惡舉從前查辦教匪會匪各案以漏網餘匪支流蔓延近又結黨成羣如江蘇盛行喫俸名目而淮安一帶尤甚直隸盛行在裏名目而天津靜海等處尤甚在官人役亦多習教之

人妄言禍福煽惑鄉愚於世道人心大有關係又如直隸滄州一帶回匪與山東滕縣嶧縣蘭山縣等處教匪以盜賊爲生業竟至父子習傳師徒授受近來廣西貴州均有大夥劫搶拒捕之案直隸山東均有劫奪公車齋本捐差之案迭經降旨嚴飭密拏而地方文武視若具文廢弛已可概見其直隸山東山西河南安徽湖北陝西四川江西廣東湖南廣西各水陸交界之區盜賊公行此等彼竄地方官吏以界址軫輻巧爲推諉之門行旅商民因人地生疏苦無控訴之路固由處分例案不嚴該管官得以取巧規避遂置緝捕於不問而各督撫養尊處優縱有嚴參勒緝之文並無掃除盜藪肅清地面之實效著各直省督撫順天府府尹等於各教會名目嚴密察訪將各匪犯餘黨遺孽掩捕淨盡從重懲辦以彰國法而正人心並隨時嚴飭各道府督率該管州縣會同營汛

員弁於交界處所加意偵緝兩地均任責成嚴查兵役賄縱包庇使匪徒無託足之所鄰境盜犯認真堵截擒拏不得稍分畛域庶盜風戢而民生安矣原摺著鈔給閱看該侍讀學士所請嚴定交界協緝章程斟酌允當不致兩歧之處著吏部妥議具奏○禮部侍郎曾國藩奏陳日講事宜並繪圖呈覽命禮部會同翰林院議奏尋奏日講一節於聽言之道取人之法兩無裨益與其弊生而停止莫若先事而不行該侍郎所陳應請毋庸置議從之○兩江總督陸建瀛奏遵籌辦設局辦理得旨卿所奏已與軍機大臣商酌依議行矣惟朕弱齡親政毫無見聞於利弊實未能深悉卿受皇考重恩簡任封圻自必激發天良實心辦理但此時係整頓之始尤須敬慎乃心斷不可有見長高興之意暴露於外俾胥役得窺測也勉之○丁卯諭內閣御史李維翰奏剔弊須責實效

一摺海防河工漕務三大端民生國計攸關非以實心行實政斷不能剔奸釐弊若如所奏山東徵納錢糧增加日多海防透漏日甚河工劣員借報險爲開銷以冒支恣浮靡漕糧則官吏浮收幫丁需索東南之民竟爲辦漕所困司漕大吏隱忍姑容尙復成何政體著海疆並漕河各督撫破除情面認真釐剔各將利弊所在悉心妥籌具奏儻仍前玩忽並不實心整頓必將該督撫重懲不貸將此通諭知之○己巳諭內閣內閣學士車克慎奏據誠陳言一摺朕詳加披覽所奏十條其於敬 天繼 志用人行政所言皆平正邇達足徵學養尙醇而繼 志二事尤覺言之切中時事朕願身體力行仰承 先志更願中外臣工敷政立言無少偏倚庶內外交修政治蒸蒸日上是則朕所願與諸臣共勉者也○庚午諭內閣太僕寺卿龔文齡奏請飭部臣實心輔政一摺國家設

官分職內外相維部臣疆吏均有稽查督率之責乃日久相沿漸成怠忽各部堂官或未能督飭司員嚴剔蠹弊考覈限期各省督撫於奉到部文後亦往往以照鈔轉行自謂了事甚至受屬員蒙混無怪利不興而害不除安能漸收實效嗣後內外大臣務須大加振刷遇事講求如有司員屬吏怠惰因循者卽隨時甄覈勿避嫌怨其有蠹吏藉端索詐立卽拏辦毋稍回護庶幾上以實求下以實應大法小廉吏治蒸蒸日上朕實有厚望焉○壬申以降調禮部尙書麟魁爲烏什辦事大臣○癸酉諭內閣戶部奏鹽引暢銷首重緝私等語淮南鹽務全在漢岸疏銷而湖廣各州縣均居腹地鄰私處處可通見當整頓淮鹺之際若仍前梟販橫行甚至奸商亦藉官鹽爲影射安望日有起色該處鹽務雖統歸兩江總督管轄而相隔既遙有鞭長莫及之勢且緝私係地方文武應辦

之事著湖廣總督湖北湖南各巡撫嚴飭鹽道督率所屬不分畛域協力查拏每獲一起私鹽具詳咨部仍於一年期滿奏報銷引分數摺內彙數以憑稽考如有查緝不力或始勤終怠之員卽著嚴參毋得視爲具文以挽頽綱而懲積弊○諭據戶部覈覆大學士耆英條奏理財之要以地丁鹽課開稅爲歲入之大端以兵餉河工爲歲出之大端得其弊之所在認真革除害去而利自見著各直省督撫河道總督鹽政各關監督查照該部指出各弊振刷精神實力剔除所有漏規浮費全應禁革並將見在如何整頓積弊辦理之處據實具奏至於漕倉諸務亦應各除各弊勿分畛域著漕運總督倉場侍郎隨時稽查幫下經紀花戶人等毋得婪索俾有藉口務使正額常充撥解無誤以實倉庫而裕度支○甲戌
恭上 大行皇帝 尊諡 廟號翼日頒詔天下覃恩有差○丙

子 上詣正大光明殿 宣宗成皇帝几筵前行三周月祭禮○
諭軍機大臣等喬用遷馳奏遵查盜犯業經就獲楚匪見已出境
一摺前因有人疊奏貴州苗匪肆劫盜案多起先後寄諭該撫嚴
密查辦茲據覆奏原摺內所稱革夷上中下三寨及山丙沙邦附
近各盜巢穴均經焚燬滋事各犯除格殺外共獲二百九十一名
分別治罪保禾等犯及舉人王湜等被搶案犯均已拏獲楚匪早
經奔逸出境日遠一日等語該撫仍當嚴飭地方文武員弁於要
隘處所慎密防守斷不可因盜犯就獲逆匪稍遠遂涉大意致令
該匪等乘閒復來再滋擾累儻有外匪入境苗民出境意圖勾結
附和者尤當嚴密查拏有犯必懲斷不准一名漏網以靖邊疆而
安良善將此諭令知之○丁丑署湖南巡撫萬貢珍奏採買糴米
一萬三千石搭運京倉○以載齡爲內閣學士

由詹事選○庚辰諭內

閣前因南河署外南同知婁晉開復處分楊殿邦又請將該員議處事涉兩歧先後飭令福濟陸建瀛楊殿邦楊以增據實明白回奏茲據各該員奏齊詳加披閱福濟陸建瀛楊以增所奏皆同惟楊殿邦一人拘執諉爲福濟陸建瀛於附片專奏拜發後始另文鈔彙移知該大臣等於辦理河漕交涉事件宜如何和衷商推詳慎具奏乃意見不合致令公事參差是楊殿邦之拘執自是不能與福濟陸建瀛楊以增和衷共濟已可概見實不勝漕督之任卽將伊撤任未爲不可姑從寬將楊殿邦交部議處予其自新以觀後效至福濟陸建瀛楊以增未能與楊殿邦商酌妥協亦有不合著一併交部分別議處至婁晉處分已據福濟陸建瀛等奏請開復應毋庸議○諭前據給事中曹履泰奏請復根窩舊制又御史周炳鑑奏稱淮南改票未可輕行一摺當交陸建瀛體察情形悉

心妥議具奏茲據奏稱淮鹺舊綱疲累已極若不變法萬難支持
並將該給事中等原奏各條逐層辦駁又片奏見在揚州開局商
民踊躍已酉綱上半奏銷可以趕辦無誤等語淮南鹽課帑項攸
關該督綜理鹽務實力講求既經屏絕眾議必係確有把握卽著
責成陸建瀛統籌全局除弊興利總期於國計民生均有裨益不
至趕辦一二次奏銷後又形竭蹶方爲不負委任○諭軍機大臣
等據裕泰馳奏楚省赴粵官兵得獲勝仗並新任提督馳赴邊界
堵剿情形一摺逆匪自黔省擊敗後復又翻山遁入粵西經裕泰
派副將博春遊擊李英等分途追剿並續派文武員弁至粵境會
合兜截於三月下旬在修仁縣屬之上思村各山內焚殺賊匪生
擒賊目李恭照等十四名該逆等竄赴永福縣之草鞋塘見令各
路跟追圍剿提督向榮已抵軍營見赴楚粵邊界駐紮調遣等語

惟所稱懷遠至修仁一帶山險路歧居民多被脅掠狼奔豕突不
實力會剿安能卽爲驅除著裕泰向榮會同鄭祖琛激勵將士奮
勇爭先探明賊蹤必竄之途設伏計誘併力兜剿至首逆日久稽
誅必應購緋捕獲使餘逆可以立平萬勿坐甲裏糧徒延時日致
逆黨流散益不可制該督等其能當此重咎耶將此諭令知之○
陸建瀛奏英人叻唆以進城一事求遞大學士穆彰阿耆英咨文
並稱不肯守候欲赴天津 上諭穆彰阿耆英將不能咨覆之處
咨明陸建瀛轉告叻唆並諭陸建瀛查照穆彰阿咨文內情節詳
加開導兩廣總督徐廣縉等於叻唆回粵後仍與堅明約束相機
妥辦直隸山東海口妥爲防範○辛巳 上詣正大光明殿 宣
宗成皇帝几筵前行百日大祭禮釋縞素 上自飛雲軒移居保
合太和養心室○壬午諭軍機大臣等寄諭直隸總督訥爾經額

有人奏直隸省盜賊公行捕役包庇據稱景州鄰境皆盜賊盤踞之區如饒陽獻縣武強等處皆有著名賊匪擾害良民且有蠶役窩家秦賊分贓情事著該督按照摺內所指姓名住址選派委員嚴密查拏毋任一名漏網儻該州縣等官實有縱容諱飾各情卽著指名嚴參以肅吏治而靖閭閻原摺著鈔給閱看將此諭令知之○乙酉直隸總督訥爾經額奏英人船隻駛至天津海口命訥爾經額剴切曉諭加意防守○調慶祺爲倉場侍郎春佑爲兵部右侍郎由盛京總部侍郎調○丙戌諭內閣通政使司參議倭什琿布奏習清文以培根本一摺清文爲滿洲本業各旗士子自應習之有素據稱考試八旗繙譯生員向有各該旗考試後錄送之例嗣後凡遇考試八旗中書筆帖式繙譯官譯漢官該旗錄送時卽照考試繙譯生員之例一體先由各旗佐領考試如佐領不諳清文卽由

參領考試仍俟都統副都統與查旗御史會考甄別錄送儻有冒名傳遞情弊立即嚴參懲辦不得視為具文稍涉怠玩○諭喬用遷奏拏獲疊劫盜犯審明定擬一摺貴州苗匪聚眾搶劫多至一百餘案復敢聞拏拒捕戕斃弁兵實屬罪大惡極經該撫飭委候補知府胡林翼等深入搜捕將各案巨盜二百九十餘名悉數擒獲不致勾結貽害辦理尙屬迅速該地方官雖經失察於前尙能協拏於後功過足以相抵所有應得處分均著加恩寬免在事文武員弁著擇其尤爲出力者酌保數員候朕施恩毋許冒濫○諭軍機大臣等寄諭湖廣總督裕泰廣西巡撫鄭祖琛此次湖南逆匪竄擾三省雖經協防會剿未能剋日殲除深恐蔓延爲患茲據奏稱月餘以來楚粵兩省文武督飭兵勇會合進剿或分途追擊或併力殲捕計先後接獲大小勝仗十數次殲斃賊匪九百餘人

生擒二百數十人見在賊匪僅有三四百人該匪疊被兜擒窮蹙竄匿已成釜底游魂該督撫等惟當嚴飭將備督率兵勇無分晝夜四路擊捕按拏以期迅就殄滅斷不可稍涉疏懈仍致乘間逃逸畱爲後患至匪首李沅發罪大惡極萬難日久稽誅該督撫等更當親提見獲各犯悉心嚴究務得實在下落設法追拏生擒授首斷不准誤信已被焚燒之說致令元惡逃遁廣西臬司升任藩司勞崇光著准其暫畱粵西督辦俟軍務告戢再赴湖北藩司新任將此由四百里諭令知之○調廣林爲盛京禮部侍郎轉靈桂爲工部左侍郎調奕毓爲工部右侍郎以和色本爲理藩院右侍郎

郎

由內閣學士遷

○予廣西陣亡縣丞賴錦榮等祭葬世職○丁亥賜陸

增祥等二百十二人進士及第出身有差○戊子 上詣清夏齋

問 如皇貴太妃安○諭內閣戶部奏請飭各省於應解應支各

款不得率請改撥而於該省積欠未完之款反延不催解支絀日形實源於此嗣後著各直省督撫鹽政監督等於戶部指撥各款務須覈實籌解不得恃有成案率請改撥其本省應支之項卽偶有不敷亦當自行籌畫不得率請協濟其積欠未完之款必應破除情面上緊嚴催該督撫等如果視國事如家事斷無催徵罔效者至各省造送春秋二季撥冊每逾例限向由戶部隨摺附參嗣後著該部於每年二月八月到限之時查明撥冊未到省分專案奏參以重帑項而肅功令○諭戶部議覆湖南糧船運義造費不敷借動藩庫銀兩又另片奏報災防弊等語湖北荊州等四衛及湖南岳州衛軍船載運湖南漕糧應徵運義造費業經因災緩徵自應准其借給以濟運行惟運務旣不能稍緩借項又未便久懸厯查舊案該五衛每歲必災每災必借其應徵之款每歲必緩每

緩必展習成故套竟未有不需奏借之年從未有如數徵還之日
明目張膽其爲捏報災荒希圖覃恩豁免已可概見著萬貢珍卽
將此案辦理蒙混緣由迅速查明據實具奏不得因本任藩司自
行回護因思湖南一省如此他省可知並著各該督撫嚴飭所屬
偶遇地方偏災務須查照定例勘驗明確分別輕重准駁毋得任
意報災有心欺罔該管道府亦應親往嚴勘覈實辦理儻有扶同
影射情弊卽著該督撫嚴行參處經此次通諭之後仍敢怠玩欺
蒙一經查出或經該部指參該地方官等試思能當此重咎否耶
懷之○己丑諭內閣陸建瀛奏訪聞湖北江西兩岸見辦鹽務情
形請飭嚴查一摺淮南新辦鹽務章程前經降旨永禁整輪裁減
岸費並令陸建瀛查有掣肘阻撓之員卽行參辦茲據該督奏稱
訪聞湖北鹽道鄒之玉仍諭各商扳提售價不遵永禁整輪辦法

以致存鹽滯銷民食增貴江西署鹽道慶雲需索月費爭競不已並有應照廉俸支繳較論等語見在整頓鹽務之時似此不遵札飭甚至需索陋規於鹺政實大有害著湖廣總督江西巡撫秉公嚴查據實參辦毋稍姑容○辛卯諭內閣戶部議覆御史涂文鈞條奏徵收加耗毋庸另議科則等語著依議至東南各省近年疊備災荒應如何興修水利籌裕倉儲及編查守禦各事宜均照所議著各該督撫嚴飭所屬認真籌畫加意撫綏一切救災禦患之計務使利濟於民不至有名無實其有辦理失宜奉行不力者卽行據實參辦以飭吏治而蘇民困○諭廣福奏參委拏賊盜冒昧具稟之縣丞一摺熱河建昌縣四家子縣丞龔衍淮於委拏著名巨盜之案並不訪查確實輒聽信弓兵一面之詞率行具稟冒昧已極龔衍淮著先行交部議處並著廣福提集該弓兵等研訊確

實有無別情並飭緝逸犯務獲究辦至捕務廢弛豈止熱河一處
近日劫竊之案層見疊出雖有一二緝獲懲辦其隱匿不報或報
不以實地方文武員弁往往改劫爲竊規避處分承緝兵役甚至
誣良爲盜冒功邀賞此等情弊在所不免著各直省督撫等嚴飭
所屬認真訪查如有似此劣員卽著從嚴參辦毋稍回護致屬吏
無所儆畏公事益形玩泄也將此通諭知之○是月貨駐紮災區
湖北黃州興國二營倉穀